

QUÆSTIO MEDICA.

QUODLIBETARIIS DISPUTATIONIBUS

manè discutienda in Scholis Medicorum,
die Jovis decimâ-tertiâ Januarii.

M. RAYMUNDO JACOB FINOT,
Doctore Medico, Præsîde.

An quia celerior pulsus, celerior sanguinis circuitus?

I.

SANGUIS liquorum facilè princeps; corpus est liquidum & fluxile, ex plurium exquisitâ permixtione principiorum, & æquabili ad se invicem proportionem constans, flammæ vitalis sedes, & totius corporis alimentum. Illius quam magna varietas: tot condit portiones, quot habet partes aut alendas, aut fovendas: non unus idemque latex; totus est protheiformis, continuo tum novorum succorum appulsu, à quibus in novos & novos jugiter status assurgit; tum continuo partium veterascentium & officio functionum ab ipso decessu. Sub primo illo aspectu, sanguis ubertate chyli mollior factus, totus iners est, lacteus, albicans, spissior, & ad motum tardus; donec tandem factâ caloris eclampsii iteratoque circuitu, veluti cohobatione quâdam, chyli seu succi nutritii copiam in partes nutriendas deponat; tunc acrior utcunque factus intensius calet, & succorum acrium copiâ ceterum totidem fermentis ad functionum renovationem onustus, eos in viscera seu incernicula cuique propria deponit, bilem in hepate, humorem lymphæum in pancreas, salivam in os, in ipsum sanguinem unâ cum chylo partim redituros. Hujus indolem si chymicâ analysi quæsieris; uberiori aquâ, salis volatilis &

sulphuris copiâ, tantillo terræ salisque fixi, acido penè nullo constare comperies: cave tamen credas arte chymicâ deduci posse particularem sanguinis compositionem; quæ sint videlicet partes illius integrantes, cujus naturæ sint & structuræ, quas proprietates habeant & virtutes, singula solis observationibus & experimentis comparanda: sanguinem alii corpus organicum asserunt, itâ dispositum ut favos apum æmuletur; quem etiam globulis rubris refertum dicunt in crystallino & limpidò humore natantibus, qui paulatim ad fundum vasis, detractò sanguine, decidui sese mutuo pondere ita comprimunt ut atropurpureum colorem reflectant; quin imò & in sero alia quoque minutissima corpuscula visui se præbent quæ figuræ sunt quadrilateræ & angulosæ; hæc corpuscula salia esse conjicias: & quemadmodum salia volatilia etiam limpidissima sulphuribus mixta rubicundum colorem induunt; sic horum grato fœdere amicoque nexu sui coloris elegantiam obtinet sanguis, ex viscido fluxilis, ex fœculento defœcatus, ex inertì vegetus, omnium operum partim suâ temperie quasi regula & norma, omnium operum partim author, partim materia. Ortum habet à chylo; hic ubi primum cor subit, mox ad parietes cordis, velut ad lapidem molarem, allisus ita conteritur, ut vividior in pulmonibus rariorque factus, in singulas evibretur corporis partes: errant qui ad hoc conclusis in corde spiritibus igneis opus esse autumant ipsiusve cordis fermento, cujus halitu & inspiratione perfusi succi nutritii incalescant, rarefiant, vitæque characterem & genuinas sanguinis dotes induant. Benignæ magis naturæ sanguis, quam ut in corde æstuosè effervescat; ejus mitis liquor amicoque succo perfusus, blandus fluxus, placidus refluxus nullum ebullitionis aut luctæ indicium produnt; jugi inprimis cietur vertigine, cujus ut perennitate sanitas viget roburque corporis, sic morâ vel intermissione quævis invalétudo sequitur.

II.

SANGUINIS motum intellexisse, Medicinæ fores aperuisse est; motus hic multiplex, progressivus unus à corde ad habitum & vicissim in circulum perficiendus; intestinus alter tenuium particularum proprius, mutuo nexu ita conjuncti, ut quò celerior ille, minutior hic; auctior quo ille tardior; scilicet circuitus motus est princeps, reliquorum omnium mo-

dus & mensura. Hujus solius causâ facilitatum cor: insigni quo valet musculi robore, sanguinem quoquoersum impellit & cum eo succos omnes, quos vel in propria incerniculâ cogit, vel in partium ostiola incuneat. Tota corporis moles vasorum ac tubulorum cumulus, ac velut ordinata quædam congeries variæ tum magnitudinis tum figuræ, sanguine succisque turgentium, variis pro variâ seu qualitate & fluendi modo, seu locis & usu. Sanguis temporario incremento decrementoque, velut æstu quodam in dies renovatur; revera nihil aliud est quam succus laevis rubore caloreque plurimo perfusus, quo partes aluntur: rubet caletque non peculiari visceris cujusdam aut cordis virtute, sed necessariâ quâdam motûs serie, evolutis explicatisque activioribus particulis. Sanguinis percolationi pulmo potissimum addictus, præcipuum lævigationis illius & attritionis instrumentum, reciproco nempe contractionis & dilatationis motu, & aëris permixtione. Sic validâ cordis contractione, pulmonum compressione attriti succi, ac velocissimè moti, ita in se ipsos agunt, ut molliores ac minus resistentes particulae à durioribus & magis concitatis comminutæ, in fluorem totæ abeant; ut licet insignis inde sanguini cor & pulmones præterlabenti mutatio accedat, non ideo tamen cor peculiarem illius officinam credideris: embolum potius aptè dicas, cujus impulsione calore summo summâque celeritate agitatus, à concretionibus tutus angustâ viarum faciliè præterit, plurimamque succorum molem ac varietatem in omne corpus faciliè diffundit; non tamen ab uno corde impetum suæ velocitatis sanguis accipit, accipit quoque ab atmospheræ gravitate, ut quo tempore minùs gravitat in pulmones aër, minùs velociter agatur sanguis, & è contra. Interim dum circuitu perenni varia perluit corporis viscera, sui ipsius intra exiles arteriarum glandulas impulsione quasi dissolutus, deponit non paucas molis suæ particulas. Secretio glandularum ope, hæc tubulorum veluti glomeres in quos arteriæ desinunt: cribra dixeris & incernicula transmittendis succis apta, an mutua configurationis ope? an quia hoc vel illo succo ab ortu semel imbutæ, non aliter ac charta bibula, reliquis percolandis impares? nec aliter evariant temperamenta, quam pro variâ sanguinis ad motum aptitudine, & fluxilitatis modo, quo fit ut partes ab eo

secernendæ per circuitûs impetum possint secerni aliæ facilius quam aliæ: sic ab uno sanguinis motu vitæ munia, ut illius æstimatione omnium integritas vitiumve terminetur.

III.

OMNIUM ergo functionum integritas & conservatio in libero faciliq[ue] sanguinis circuitu tota sita est; hujus cessatio mors; morbi causa tarditas & mora nimia: sanguini moras injiciunt penè innumera, nihil magis quam chylus degener, & inde nata succi nutritii & sanguinis ametria & inæqualitas, morborum ferè omnium fomes & pabulum. Alimenti coctio actio unica est, nec aliud esse videtur hæmatosis, quam quædam ipsius chyloseos extensio; actio hæc incipit in ore, augetur in ventriculo, promovetur in intestinis, perficitur in præcordiis, corde, pulmonis arteriis; & quemadmodum chylosus ciborum attenuatione continetur, & exquisitâ in lacteum cremorem triturâ; sic hæmatosis in absolutâ ejusdem succi nutritii ad perfectam usque partium nutritionem, jugemque reliquiarum perspirationem triturâ, tota posita est: hæc si deficiat, vitiatur sanguinis crasis, ipsiusque circuitui obices fiunt; nulli frequentiores, quam qui ab acido hostili & deurenti, cuius aspergine, admoto veluti coagulo, spissior sanguis liquescit in serum albugineum modo & concrescibile, modo aqueum & excrementitium. Solida liquidis malè permixta passim hærent, ægriùs profluunt, hinc plurima hypochondriacorum & scorbuticorum hominum seges, plurima affectionum convulsivarum, vaporis specie, turba. Sic alimenta δυσπεπτα visco glutineque prædita, crudo lentoque succo turgidula, dum se teri non sinunt, justam veluti maturationem non assecuta, crudioris puliculæ formam induunt, vivifico nectari obices facturam. Nec rarò vitalis latex languore quodam ac veluti deliquio fatiscens, muneri suo impar, succum alibilem sibi jugiter affusum, crudum elabi sinit in mucilagines, quæ sibi passim occurrentes lentore coalescunt; hinc non infrequens cachexia & habitus hydropiformis; sed nulla perniciosior occurrit labes, quam dum igneâ quâdam vi & acredine perfusus sanguis pinguiore chylo exuberans, gelatinæ æmulus, crassitiem induit in ipsis vasculis à detractiōe observabilem. Lympham igne coalescere omnibus notum; sicut ergo gelatina

luculentiori flammæ admota corneam duritiem contrahit, sic in sanguine succus alibilis exæstuans, crassior factus, ac penè concreescens, motui impar, vasa distendit, nec sine magnâ mole circulum suum implet; hinc ferè tota febrium incumbit cohors præsertim acutarum, & inflammationis omne genus: sic impeditis sensim visceribus, oppleto habitu, tubulis infarctis, serpit lassitudinis sensus, arctus dolor occupat, cessat functionum integritas, pendent secretiones interruptæ, febris accenditur, & incitatis spiritibus velut æstro percitum cor, pulsus ingeminat: quæris quid rei est? segnior sanguis hæret passim, cuncta ingurgitans. Dubitas adhuc? ad ipsius genium attende lactis æmulum, cogi facilem; attende ad illius molem simul & velocitatem, nec enim minùs tredecies singulis horis etiam viginti sanguinis libræ plus minus per cor circumfluunt; attende ad tramites quos præterlabitur, tenues, arcanos, penè nullos, mirari desines ab his initiis tantum oriri malorum.

I V.

SANGUINIS constitutioni respondet universi corporis status pulsus inprimis ictu reciproco vitæ gubernacula temperans: gubernacula vitæ, debita sanguinis crasis, & facilis ejusdem circuitus: utrique famulatur pulsus; pacatior, si liber hic & expeditus; citatior, si difficilis & contumax. Non ergo ex ipsâ quæ pulsum inter & sanguinem adest proportio, inferas frequentiore pulsum consequi, circuitum sanguinis celeriore; imo hunc perturbatum, impeditum, cessantemvè quadamtenus: quemadmodum enim respiratio eò celerior subtiliorque, quò plùs partes spirabiles vel humorum sarcinâ graves, vel sanguinis morâ tumidæ; ita cum sanguis cæcos viscerum recessus tenuesque vasorum tubulos non sine gravi negotio permeat, pulsus sit crebrior, vehementior, amplior; corde videlicet in contumacem ac refractarium sanguinem velut arietante si vires sint; sin attritæ, minutulis pulsationibus densissimè repetitis quasi damnum resarciende: ea nimirum est finem inter & efficientem consensio, ut ad illius necessitatem vim suam hæc roburque minuatur intendatve; sic pro variâ lucis accessione, velut ictu quodam succussâ pupilla, plus minùs stringitur aut aperitur; hinc nîsum in excrementorum eva-

uatione ratio, varia, pro variâ humoris excernendi tum qualitate tum copiâ. Integrâ valetudine sanguine tenuitatem suam ac fluxilitatem servante vix incitantur arteriæ, ut & arctius contrahi & amplius dilatari possint; per meatus patentes liberè diffusus calor, vegetus licet & efficax, vix tamen perceptibilis, hinc rarior pulsus. In febribus è contra crassior sanguis arteriæ vix mediâ sui parte se contrahenti ægrè cedit, nec unica contractio satis est ad propellendum sanguinem: spirituum radii passim collisi, non aliter ac lux per aërem crassum, passim impingunt, ut acceleratione motûs, pensanda veniat tarditas, & inertia vibrationum conduplicatione acuenda: atque ut minimus impetus per multam vasorum longitudinem plenitudinis interventu delatus facilè persentitur, sic ea est illius consensionis vis & proportio, ut sanguini etiam in minutis meatibus longèque distitis hærenti cordis vibratiuncula exquisitè respondeant. Non arctiorem habent rotulæ cum elatere, nec elater cum rotulis nexum concentumve. Interim quantum de motu principe decedit, tantum accedit intestino; sopitus calor emicat, tumet sanguis, in succos hostiles assiduè liquefcit ignemque spongiosâ sui densitate admissum latè spargit in habitum corporis, serpit mali labes, furitque gravissimis atrox symptomatis. Quæris quid præsto sit? pulsûs frequentia præcipuum divini se ipsum tuentis opificii instrumentum; hoc ipso malè subactum sanguinem compellit, morbosque sine arte debellat, nec prius cessat quam sublato obice liberior factus vivificus latex inoffenso cursu præterfluat.

V.

APTE satis anthliam vitalem cor vocavere, quæ ut sanguinem haurit vicissimque diffundit, sic motus suos ita pro vitii modulo temperat, ut quò gravius illud fuerit, eo magis nixibus suis, velut exantlatione quâdam, crebrius crebriusque repetitis sanguinem urgeat prematque variè circumagendo: his viribus stat vita, vitæque ratio & mensura, huic naturæ legi cuncta subserviunt. Quot functiones, tot auxilia; hinc in omnibus febribus, acutis potissimum, crebrior & fortior respiratio, cujus reciproco motu comminuti succi depositi lentore ad motum paratiores exiliunt: præsidio est & ipse dolor, & humorum acredo; dolor impulsione fit &

succorum nisi in transitu impeditorum, doloris sensu incitatae partes sensibiles in motus aguntur celeriores, quorum pressione tenuati succi in libertatem veniunt; & ipsa sitis in subsidium adest, cujus uredine largo potu assumpto dilutior sanguis, per angusta viarum vegetior fluit, ut quæ prius erant symptomata, eventum fiant auxilia, quorum concursu sua sanguini succisque libertas, vel integra servatur, vel labefactata restituitur. Sed audio quosdam sic obloquentes; quomodo in febribus acutistardior fuerit sanguinis motus? in quibus æstu cuncta deurrunt, ebullit sanguis, ipsaque rarefactione tenuior, flammæ instar, velocissimè quoquoersum non tam fluit quam rapitur, ut & sectâ venâ saliat fervore plurimo & plerumque ruptis veluti repagulis, è naribus, utero, ano, imo & ipsâ tussilargissimè effluat, nec aliter compesci possit quam multiplici venæ sectione, largoque & assiduo refrigerantium usu. Reverà ita est; sed non idèo velocior sanguis; quin potius à cunctatione, viscerum & ambitus ardor, caloris febrilis sensus: visceribus interclusis factoque obice sic coercetur sanguinis cursus, ut inde præceps feratur ad caput & habitum, jamque cerebrum sopor occupat, ipsaque syderati sanguinis stygmata in cute emicant purpureis maculis hinc & hinc depictâ; hæmorrhagiæ plurimæ intercepto arterias inter & venas aditu, saliente per venæ sectionem sanguine non tam fervoris impetu quam pressionis robore: scilicet igneâ vi prægnans spissior sanguis quò plus tumet, eò minùs progreditur, & vasorum parietes distendendo ipse sibi moras necit & impedimenta; hinc universalissimum in febribus venæ sectio præsidium, quod eam liquoribus motus facilitatem conciliet, quâ solâ duntaxat ad sui depurationem venire possunt; ut qui in hoc casu tenuandi sanguinis consilio temerè & incautè calidiora exhibeat, specie recti delusus omnia velut incendio miscet, spiritus ac vires frangit fugatque, crudiores succos dispergendo versùs obstructos meatus altius impingit, tumultus & orgasmum excitat aut exasperat; uno verbo plus stimulando nocet, quam aperiendo proficit; ut reverà quæ tenuando leniunt, aut leniendo attenuant fere sint omnium maximè consentanea, diluentia scilicet quæ eam sine fervore salutifero necari fluxilitatem conciliant, cujus ope, non aliter ac mobile perpetuum, circulum

suum facilius, tutius, & celerius impleat sanguis, in omne volubilis ævum, si arte magistrâ fluxilis semper per flexiles semper tubulos.

Non ergo quia celerior pulsus, celerior sanguinis circuitus.

Domini Doctores disputaturi.

M. Michaël Sawalle.

M. Claudius Bourdelin.

M. Raphaël Mauvin.

M. Claudius Burlat.

M. Joannes Franciscus Foy-
Vaillant.

M. Petrus Creffé.

M. Alexander Petrus Mattot.

M. Alexis Lître.

M. Alexander Michaël
Deniau, Profess. Regius.

Proponebat Parisiis FRANCISCUS AIGNAN,
Aurelianensis, Baccalaureus Medicus. A. R. S. H. 1701.

Apud FRANCISCUM MUGUET, Regis & Facultatis Medicinæ Typographum.